

26.marts 2015

"Kulturikkut ingerlatsineq sunngiffimmilu sammisassaqaqtitsineq pillugit Inatsisartut peq-qussutaata nr. 10-p, 21. maj 2002-meersup allannguutissaatut siunnersuummik kingusinnerpaamik UPA 2016-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut kulturimut immikkut inatsim-mik aammalu timersornermut immikkut inatsimmik suliaqartoqarsinnaaqqullugu."

(Inatsisartunut ilaasortaq Peter Olsen, Inuit Ataqatigiit)

“Kulturikkut ingerlatsineq sunngiffimmilu sammisassaqaqtitsineq pillugit inatsisartut peqqussutaata nr 10, 21. Maj 2002-meersup allannguutissaattut siunnersuummik kingusinnerpaamik UPA 2016-imi Naalakkersuisut saqqummiusseqqullugit peqquneqarnissaannut saqqummiussaq ima Siumumiit oqaaseqarfigissavarput.

Timersorneq peqqinnarnerusumik inuuneqarnissamut tunngavissiisarpoq, peqqinnartumillu inuuneqarnissamut aqqutissiuisuulluni, aamma taamaappoq kulturip iluani pinngorartitsineq inerititaqarnerlu kinaassutsitsinnut annertuumik tunngavissiisartoq.

Kulturi, timersorneq sunngiffimmilu sammisassat tassaapput inuiaqatigiinni anersaakkut timikkullu peqqissumik inuuneqarnissatsinnik annertooujussuarmik tunngavissiisut. Kulturikkut pinngorartitsineq aallavigalugu timersornikkullu ingerlatsinerup inuiaqatigiinni kinaassuserput ataatsimoorinnaanerpullu annertuumik ikummarissartarpaa, miserratigissanngilarpullu timersornerup eqqumiitsuliornerullu iluani annertooujussuarmik sammisassaqaqtitsinerit inunnik ataasiakkaanik nukippassuarnik atuiffiusarmata, tamakkulu aamma eqqumaffigineqartariaqarmata.

Nunarsuarmioqataanermik paasinnineq annertusiartortillugu inooriaatsitta assigiinngissutsittalu pitsaasunik ullutsinnullu naleqquttunik inatsiseqartinnissaat pingaarpoq.

Taamaammat nuannaarutigaarput Naalakkersuisut UKA 2015 inatsimmik ersarinnerusumik nutarterisoqarnissaannik saqqummiinarlutik pilersaarmata, taamaalilluni aalajangiiffigisassatut siunnersuutip matumap siunertaa suliarineqarluni ingerlalereersimammat.

Taamatut oqaaseqarluta aalajangiiffigisassatut siunnersuutip akuerineqannginnissaanik naalakkersuisut oqariartuuteqarnerat Siumumiit ilalerparput.

Vivian Motzfeldt, Siumut